


MUNUNGI YA NENE

MPE YA NGOLO

 Mbote, na beno. “Paki ya Mbote” mingi na mosi na mosi ya beno! Yayi kele mosi ya bilumbu ya kulutila nene, na lubambuku ya mvumbukulu ya Mfumu ya beto. Ya kele mosi ya bilumbu ya kulutila nene ya masolo nionso ya yinza. Ya kele mvumbukulu. Mpe beto ke na kiese mingi na kuvwanda awa, na suka yayi, na kilumbu yayi ya nene. Mpe kumona kubasika ya mwini, mpe bafololo ke na kubasika na ntoto, bima nionso ke na kutubila Paki.

Mpe ntangu yayi bika beto kulumusa bayintu ya beto na mwa ntangu fioti.

² Tata Nzambi, na Mwandulu ya Nge beto me kwisa. Mpe beto ke na kvingila Nge samu na kupesa beto, na suka yayi, kaka mwa lusakumunu ya kulutila me katuka na Zulu, mwa kusimba mosi ya Paki na kati ya mioyo ya beto; ti, ntangu beto ke katuka awa, beto lenda tuba, mutindu bayina katukaka na Emmaüs, “Bantima ya beto vwandaka pela na kati ya beto, samu na Mvwandulu ya Yandi?” Samu, beto ke lomba yawu na Nkumbu ya Yandi, mpe samu na nkembo ya Yandi. Amen.

³ Kuna na buku ya nsuka, kapu 28 ya Nsangu ya mbote ya Santu Matthieu, mpe na nzila ya 7, mu zola kutanga samu na dilongi, mutindu beto ke kota na lukutakanu yayi.

Mpe beno kwenda nswalu nionso na sika ya bilandi ya yandi mpe beno tubila bawu ti yandi me vumbuka na lufwa; mpe, ntangu yayi, yandi ke na kvingila beno na Galilée; kuna beno ke mona yandi: beno tala, nsangu yina mu me kwisa kuzabisa beno.

⁴ Ya me vwandaka na balutumu mingi ya nene ba me pesaka na bantu mpe bantu ya ntoto yayi. Kasi ya me vwandaka ata fioti ve na lutumu ya mfunu ba me pesaka mutindu yayi, “Beni kwenda tubila bilandi ya Yandi ti Yandi me vumbuka na lufwa.” Ya kele lutumu ya nene. Mpe mutindu mosi kaka yayi lendaka pesama, vwandaka samu ya zolaka vwanda na lunungu ya nene, ntete.

⁵ Ya me vwandaka na bantu na bilumbu ya beto, mpe na bilumbu yina me luta, mpe na kati ya masolo ya nene ya yinza yayi, na kati ya bunene ya yawu, bilanga ya nene ya bitumba; ya me vwandaka na banungi mingi ya nene, bima mingi ya nene yina me salama samu na bantu.

⁶ Mutindu, mu ke banza, mutindu mu vwandaka kwisa na suka yayi, mu me vumbuka na suka-suka, mpe mu me kuzwa ve

siansi ya kutanga mingi. Samu, mu zabaka ve kaka yinki kitini, mazono na nkokila, beto zolaka vwanda na yawu bubu yayi, kati-kati ya pasteur na munu, na balukutakanu. Kasi ntangu mu vwandaka kwisa, ya me salama ti mu banza yinki, na suka yayi, ke vwanda ya kulutila mbote yina mu me zaba samu na kutuba na bantu ya Yandi, samu na kubaka nsangu mosi. Mu banzaka mutindu yayi, “Kwenda tuba na bilandi ya Yandi.” Ntangu yayi, bilandi *ya Yandi* kele “bayina ke landaka” Yandi. *Kilandi* kele “yina ke landaka.” Mpe mu banzaka na dilongi yayi, ya, *Munungi Ya Nene Mpe Ya Ngolo*.

⁷ Mpe kubanza na banungi yikwa beto me kuzwa na yinza yayi, mpe yinki bima ya nene ba me sala samu na kusadisa mpe kusoba mutindu ya kulutila mbote ya kuzinga ya bantu. Mu vwandaka banza na Napoléon ya nene, kuna na bilumbu ya yandi, wapi mutindu yandi vwandaka kaka ve Mufalansa, kasi yandi vwandaka na kima mosi na dibanza ya yandi. Ntete, yandi—yandi vwanda vweza France, yandi vwandaka zola yawu ve. Yandi katukaka na bisanga. Kasi yandi vwandaka na dibanza na yintu ya yandi, ti, kilumbu mosi ti yandi ke nunga. Mpe kikuma yina yandi vwandaka na yayi na dibanza ya yandi, yandi zolaka kuvwanda na kima mosi samu na kusadila.

⁸ Samu na muntu nionso, na ntwala nge lendaka sala kisalu mosi, nge fwana vwanda na mwa mitifi, mwa nsodolo, kima yina beno ke sadila, samu na lukanu ya kisalu mosi, kima yina beno ke sala na nzila ya yawu.

⁹ Mpe mutindu beto nionso me zaba, na kubakaka disolo ya Hitler. . . to, ya kele Hitler ve, kasi ya—ya Napoléon, ti yandi kwendaka pene-pene ya ngonda, mpe na lupindulu ya bambwetete. Yandi salaka mutindu yina, mpe vingilaka; samu ti na ntangu mosi yandi salaka mutindu yina, mpe yandi bakaka lunungu. Mpe yandi kwendaka kuna na France, mpe yandi kumaka munwani mvita ya nene. Yandi kufwaka bantu mingi, samu ti ba zolaka ve kuwisana na yandi. Mpe yandi sukulaka yinsi ya yandi ya muvimba, na kima yina nionso vwandaka me telemina yandi. Yandi bebisaka yawu kaka nionso, samu yandi zolaka ti ya vwanda mutindu yina. Kana yandi salaka yawu ve mutindu yina, ya zolaka vwanda na kima mosi kutelemina yandi ntangu nionso, mpe manaka ya yandi ya nene yina ya vwandaka na yawu na dibanza ya yandi. Luzingu ya yandi mosi zolaka vwanda na kigonsa, na yina yandi zolaka vwanda na kimfumu ya yandi ya muvimba kaka ya kulunga mutindu yandi zolaka ya vwanda.

¹⁰ Mu ke banza ntangu yayi ti beno ke na kulanda munu na yayi, samu na Munungi ya nene yina mu ke banza. Bima nionso na Kimfumu ya Yandi fwana vwanda samu na Yandi. Ya fwana vwanda ntima, moyo, mpe nzutu, samu na Yandi. Ya lendaka vwanda ve na kima mosi yina me telemina Yandi. Kima yina nionso vwandaka me telemina Yandi, Yandi zolaka kukatula

yawu. Yandi fwana vwanda kaka na bima nionso samu na Yandi. Mpe ntangu . . .

¹¹ Napoléon, yandi bakaka minduki, ba-canon, minduki, ba-mousquet, bambele ya yinda. Mpe yandi kwendaka na ntwala na yayi na nkokila mosi, ti yandi zolaka kununga yinza. Mpe ya kieleka yandi salaka yawu, yandi vwandaka na bamvula makumi tatu na tatu. Ntangu yandi vwandaka toko ya bakala, yandi vwandaka prohibitioniste. Mpe lukumu ya yandi ya nene pesaka yandi nkumbu mosi; mpe ya vwanda kotisa yandi na kidi-kidi, na yina yandi kufwaka na bamvula makumi tatu na tatu, kinwa malafu. Kuzabana ya yandi, yandi lendaka ve kukanga ntima. Mpe mu ke banza na bakala mosi, yina na yayi, na bamvula makumi tatu na tatu, yandi nungaka yinza mpe yandi kufwaka kinwa malafu, samu na lukumu ya yandi, mpe yandi zimbanaka lukanu ya kieleka yina yandi vwandaka nwanila. Yandi vwandaka—yandi vwandaka mwa kifwani mosi, to, kifwani ve, mu zolaka tuba, kasi yandi vwandaka kisalulu ya diabulu. Mpe ya vwandaka meka na kunwanisa yinza, mpe yandi lembanaka, na bamvula makumi tatu na tatu.

¹² Kasi, oh, Munwani mvita yayi ya nene, ya ngolo yina mu ke na kutubila, na bamvula makumi tatu na tatu, nungaka bima nionso yina vwandaka na ntoto mpe na—na difelo. Na bamvula makumi tatu na tatu, Munungi ya nene mpe ya ngolo!

¹³ Mu ke na kutubila bitumba ya nene yina ba me nwanaka na bilanga ya mvita. Beto me zaba, samu na kumanisa na Napoléon, ti yandi kumaka na nsuka ya yandi na Waterloo. Ya vwandaka bweso ya munu, ntama mingi ve, na kutala bakumekula yina salaka ti ba-chariot ya yandi kubeba, mpe kubeba ya minati bampunda mpe ya bantu, wapi mutindu ba tandamaka na kilanga ya bitumba. Mpe ba-chariot mosi na zulu yankaka, ba-piné ya kubeba, na lweka ya kibakala mpe na kati ya bandimba, kisika wapi diambu yayi ya nene me salama.

¹⁴ Mpe yinki diambu ya luswaswanu ya kele: kumona ti bakala ya bamvula makumi tatu na tatu, mpe nsoni yina me bikala kuna na lubambuku ya bitumba ya yandi ya nene mpe lunungu; na yina kukwenda na Jérusalem, mpe kutala ntoni ya mpamba, mutindu lubambuku ya Munungi ya nene mpe ya ngolo.

¹⁵ Na kutala yankaka, ya kele na kima mosi ya kununga. Kana beto ke na kima mosi yina beto ke na kunwanina, kana ya kele na maladi na nzutu ya beto, mpe beto ke na kunwana kati-kati ya lufwa mpe luzingu, yinki lunungu ya kele ntangu beto ke mona ti ba me nunga yawu. Kana beto ke na kunwana samu na mwa bikalulu ya nene, to mwa kima mosi ya nene yina ke na kuniongisa beto, kana na nsuka babendele ya nene ke pepa mpe beto me nunga yawu; wapi nsatu ya ke pesa beto, na kati ya beto, samu beto lenda na yina kuvwanda munungi.

¹⁶ Ntangu yayi mu ke banza na mvita ya nsuka, mpe wapi mutindu yina ntangu Hitler bakaka Varsovie. Mpe ba-Allemand banzaka ti yina vwandaka mosi ya kulutila balunungu yina lendaka vwanda, samu ti kapitene ya bawu ya nene ya mbuta, Adolf Hitler, bebisaka mbala mosi bima nionso na Varsovie, mwanngisaka bakiamvu, mpe kiamvu ya nene kubwaka. Bazulunale namikaka bizizi ya nene ya kubwa ya kiamvu. Ba-Allemand tambulaka na bala-bala, mpe ba bulaka ba-drum mpe ba bulaka ba-sifflet, mpe mafunda ya ba-avion lutaka penepene ya yandi, mutindu yandi bakaka lunungu ya yandi ya ntete ya nene. Ya vwandaka kuna mutindu Alexandre le Grand, to Napoléon, samu na kununga yinza, kasi wapi kisika yandi sukaka? Na nsoni. Ya kieleka, ya sukaka mutindu yina.

¹⁷ Mu lenda bambuka moyo ntangu ba tungaka Nzila ya nene ya Birmanie. Ya fwana vwanda . . . kana ba lutaka na zulu ya mongo. Ya ke na mwa bana-babakala yina kele ya kuvwanda awa na suka yayi, ntangu yankaka, yina me lutaka na nzila yayi. Yinki kisalu ya vwandaka! Wapi kisalu ya nene ya lombaka, mpe yinki kisalu ya nene ba salaka! Mpe mbongo yikwa ya lombaka samu na kutunga Nzila yina ya Birmanie, ba-million ya ba-dollars! Bana-babakala zimbisaka baluzingu ya bawu, samu na kusala yawu! Kasi na nsuka, mpe na manima ya mwa ntangu fioti, ntangu ba manisaka ba-kilometre ya nsuka ya nzila, mpe ntangu ba manisaka nzila, ti wapi mutindu bantu bokaka samu na lunungu! Ba vwandaka na nzila ti ba lendaka kuluta na zulu ya miongo, samu na kubaka lunungu.

¹⁸ Mu ke banza na nzila yankaka, ti kilumbu mosi ya lombaka luzingu ya Mfumu ya beto ya kusakumuka. Ya vwandaka kaka ve nzila na zulu ya ntoto, kasi ya vwandaka bala-bala ya nene ba ke bokila “bala-bala ya nene ya busantu,” kisika muntu ya mvindu ke luta ve, kasi kaka bayina ba me tula kidimbu. Kaka bayina kele na lweka yina Yandi kele, ke luta na bala-bala yayi ya nene.

¹⁹ Ba me bakaka balunungu mingi. Mingi ya beto bubu yayi lendaka bambuka mbote Mvita ya Ntete ya Yinza ya muvimba. Mu ke bambuka moyo ntangu mu vwandaka kaka mwana-bakala ya fioti, mu lendaka kuwa ba-sifflet ke bula; mpe ata ti ba-fermier, na bilanga, telemisaka bampunda ya bawu, mpe katulaka bayimpu ya bawu. Ba bokaka. Ba vwandaka sala makelele. Yinki salamaka? Mvita sukaka. Ba bakaka lunungu. Mumbungu ya nene yina beto vwandaka nwanina, na nsuka beto me kuzwa lunungu.

²⁰ Mu ke banza na mvita ya nsuka ya yinza ya muvimba. Mu vwandaka zinga kaka na simu ya nzila. Mpe ntangu ba-sifflet bandaka na kubula, bantu ke kima mbangu na balupangu; bakento vwandaka me lwata ba-tablier ya bawu, ba vwandaka katula yawu, mpe vwandaka losa yawu na mupepe. Ba-balle pumbukaka na bayinti. Ba-sifflet bulaka. Matoma kwendaka

mbangu na babala-bala. Bantu fukamaka na mabolongo ya bawu, mpe telemisaka maboko ya bawu na zulu. Ba bokaka. Ba dilaka. Samu na yinki? Samu mvita sukaka. Mpe bantu ya kusakumuka, bana-babakala ya luzolo yina vwandaka na simu ya mubu, lendaka mbala mosi kunata masuwa samu na kuvutuka diaka na yinzo ya bawu. Wapi mutindu ya lunungu! Wapi mutindu ya ntangu, mpe kiese na ntima nionso! Wapi mutindu ya jubilé! Na nkokila yina, muntu nionso vwandaka na nsatu yina, beno lendaka kota na restaurant mosi mpe kudia, mpe kubasika mpe kukondwa kufuta samu na yawu, ya lendaka vwanda mbote mingi. Beno lendaka sadila ditoma ya muntu yankaka, ya lendaka vwanda mbote mingi. Beno lendaka lomba yina beno me zola, mpe beno lendaka kaka kuzwa yawu. Samu ti yinki? Ba bakaka lunungu. Bana-babakala vwandaka vutuka na yinzo. Ya vwandaka me suka.

²¹ Mpe mu ke banza, mpangi ya munu ya bakala, ya kele yimbi mingi ti bansatu ya mutindu yina lendaka vwanda ntangu nionso. Kasi, samu na Muklisto, na suka yayi, ba me baka lunungu. Bangunga ya kiese ke na kubula. Mvita me suka, kati-kati ya Nzambi mpe muntu. Ba me baka lunungu.

²² Na ntwala lunungu nionso kuvwanda, ba fwana vwanda futa bantalu ya nene. Oh, wapi ntalu! Mpe bantangu yankaka ya kele ya mudindu mingi, mpe ya ke sala bidimbu ya bamputa ya nene, ya ke lwadisa. Kasi, samu na kuvwanda na mongo, beto fwana vwanda na kiwanda. Na ntwala beto kuzwa kusema ya mwini, beto fwana vwanda na mvula. Na ntwala beto kuzwa nsemo, beto fwana vwanda na mpimpa. Ntete beto kuzwa mbote, ba zolaka kuzwa yimbi, to beno zolaka zaba ata fioti ve yina yimbi vwandaka.

²³ Kasi samu na kununga mpe kununga bitumba ya kulutila nene yina muntu nionso me nunga, Mosi basikaka na Nkembo, bamvula mingi me luta. Mpe Yandi bakaka ve na zulu ya Yandi kifwani ya Wanzio. Yandi kwisaka ve mutindu muntu mosi ya nene. Kasi Yandi zolaka kusiamisa ti ya ke lomba ve ba-mousquet mpe ba-balle, mpe ba-bombe atomique, samu na kununga mvita. Yandi kukikulumusaka Yandi mosi, mutindu kubé ya fioti, mpe butukaka na kidikilu. Ya vwandaka ata na kisika ve samu na lubutuku ya Yandi, ntangu Yandi kwisaka. Mu ke zola kutala bisadilu ya luswaswanu ya mvita, yina Yandi sadilaka.

²⁴ Ntangu yayi, dikanda ya Adam nionso vwandaka na kimpika. Kuna ba vwandaka, kukondwa kivuvu, kukondwa Nzambi, kukondwa siansi, kukondwa mawa, kukondwa kima yina lendaka sadisa bawu. Bambeni ya nene, ya bizunga ya nsi ya bantu ya kuzimbana, kangaka bawu na kati ya mudidi. Ya vwandaka ve na nzila ya kubasika. Ya vwandaka na mosi ve samu na kusadisa bawu. Kima mosi ve lendaka sala yawu. Ya monanaka mutindu kubwa ya muvimba, ya kimakulu.

25 Kasi Hero ya beto, Yina katukaka na mielo ya Nkembo, kulumukaka!

26 Na yina, ya vwandaka na muntu ve na zulu ya ntoto lendaka sala ksalu. Ba vwandaka bawu nionso, na nzonzolo ya yinza, na masuwa mosi. Beto vwandaka, beto nionso, “me butuka kati na disumu, me salama na disumu ya nkú, me kwisa na yinza na kutubaka baluvunu.” Mpe ata mosi ve na kati ya beto lendaka sadisa yankaka. Beto vwandaka kukondwa lusalusu, kukondwa lunungu, kawo na diboko nionso, beto nionso ya kukabwana. Beto lendaka ve kuzitisa misiku mpe mikembu, kumona bakulemba ya bawu mpe nionso yina, beto lendaka ve kusala yawu. Mpe ya monanaka ti bantu nionso vwandaka ya kubeba.

27 Na yina Yandi kwisaka, Yandi kulumukaka. Samu, “Yandi vwandaka na mbandukulu,” Biblia me tuba, “Yandi vwandaka Ndinga.” Yandi vwandaka Logos yina basikaka na Nzambi. Mpe Logos, na mbandukulu, vwandaka Ndinga. Mpe Yandi kumaka Ndinga. Na yina ntangu Yandi tombokaka na kilumbu yina ya nkembo ya Paki, Yandi kumaka kaka Ndinga ve, kasi Yandi kumaka Nganga-Nzambi ya Mbuta ya Ndinga ya Yandi Mosi. Oh, wapi kima ya nkembo, Mpangi Neville! Banza yawu kaka! Yandi kele kaka Ndinga ve, kasi Yandi kele Nganga-Nzambi ya Mbuta ya Ndinga ya Yandi Mosi. Wapi mutindu beto lendaka sala ntembe na yawu? Wapi mutindu beto ke kuma na Yandi mpe me kukwikila ve ti beto me kuzwa yina beto me lomba? Na yina, Yandi kele Ndinga mpe Nzongi ya Ndinga! Logos kumaka Ndinga, mpe Ndinga kumaka muntu; mpe muntu yina vwandaka Ndinga, me yambama na Nkembo, mpe ntangu yayi Yandi kele Nganga-Nzambi ya Mbuta yina ke na kulomba, na nzila ya Yandi mosi, na Ndinga ya Yandi.

28 Yawu yina ya ke lomba! Ya kele kisadilu yina Dibuundu kele na yawu. Yinki munduki! Ya vwandaka ata fioti ve na mosi mutindu Yawu. Yandi vwandaka Ndinga. Mpe ntangu Yandi kwisaka, Yandi butukaka na kati ya kidikilu. Yandi kwisaka samu na kusadila munduki ya z-o-l-a, zola, samu na kununga yinza; ya kele ve na ba-balle ya makesa, ya kele ve na bamasini ya minduki mpe ba-char de combat. Kasi Yandi kwisaka na mutindu ya luswaswanu. Yandi kwisaka na kifwani ya zola. Yandi vwandaka zola ya Nzambi.

29 na ntangu mosi, mutindu mwana-bakala mosi ya fioti, mu vwandaka banza ti Klisto zolaka munu, mpe Nzambi yinaka munu; samu ti Klisto kufwaka samu na munu, kasi Nzambi vwandaka na kima mosi yina me telemina munu. Kasi mu me bakula ti Klisto kele ntima ya kieleka ya Nzambi. “Nzambi zolaka mingi yinza, ti Yandi pesaka Mwana ya Yandi ya luzolo mosi kaka, ti muntu nionso ke kwikila na Yandi ke kufwa ve, kasi yandi ke kuzwa Luzingu ya Kukonda nsuka.”

³⁰ Ntangu yayi Yandi me kwisa, ntete, samu na kununga. Mpe kima yina diabulu me tula na yinza vwandaka kimbeni. Mpe Yandi kwisaka samu na kununga kimbeni. Ntangu beto me nunga bitumba ya beto, mpe nionso yina, na bitumba ya yinza, ya ke kwenda kaka, ntangu nionso, kimbeni; samu, bitumba ya mutindu yina kele ya mbeni. Kasi Klisto kwisaka na zola, samu na kununga kimbeni, samu na kuzola bayina ba lendaka kuzola ve. Yandi kwisaka na munduki ya luswaswanu. Mpe Yandi kukukulumusaka Yandi mosi, “Yandi kumaka na nsi mingi kulutila Bawanzio,” samu na kufwa, mpe samu na kupesa mbandu. Mpe ntangu Yandi vwandaka awa na zulu ya ntoto, Yandi me tambula na kati-kati ya bantu.

³¹ Yandi siamisaka minduki ya Yandi ya mvita, ntangu Yandi belusaka bambevo. Ntangu Yandi bakaka mwa mampa tanu mpe bitini zole ya bambisi, mpe disaka bantu mafunda tanu, Yandi siamisaka ti Yandi vwandaka na ngolo na zulu ya bombe atomique nionso yina vwandaka. Yandi yalusaka kaka bambisi ve, kasi Yandi yalusaka bambisi ya kulamba. Yandi yalusaka kaka blé ve na kati ya mampa yina, kasi Yandi yalusaka blé na kati ya mampa yina. Ya talisaka ti Yandi vwandaka Munungi yina ya nene mpe ya ngolo! Yandi bakaka kaka ve masa na dibulu ya masa, kasi Yandi salaka masa yina, vinu, yina me katuka na dibulu ya masa. Yandi siamisaka ti Yandi vwandaka na Ngolo ya kununga. Mpe Yandi zolaka, mpe munduki ya Yandi vwandaka zola. Ntangu yayi beno tala.

³² Na manima ntangu Yandi salaka yawu, ntangu Yandi telemaka kilumbu mosi na lweka ya ntoni ya Lazare, mpe ya vwandaka na muntu bakala mosi, kufwaka, mpe ba zikaka yandi bilumbu yiya. Ata mpe bayina vwandaka pene-pene, tubaka, “Ata mpe ntangu yayi yandi ke basika nsunga ya yimbi.” Mbombo ya yandi vwandaka me patamana, misobi vwandaka tambula na kati ya yandi. Mpe Yesu telemaka kuna, mutindu Munungi ya ngolo, ntangu Yandi tubaka na Marthe na Marie, ntangu Yandi telemaka kuna, “Mu tubaka na nge ve, ‘Kana nge lendaka kaka kukwikila, nge ke mona nkembo ya Nzambi?’” Yandi landilaka kaka na kutuba (ntangu ba tubaka, “mpangi ya beto ya bakala me kufwa,” mpe nionso yina), Yandi tubaka, “Mu kele mvumbukulu mpe Luzingu! Yandi yina ke kwikila na Munu, ata ti yandi me kufwa, yandi ke zinga. Mpe yandi yina ke zinga mpe ke kwikila na Munu, yandi ke kufwa ata fioti ve. Mu me tuba na beno ve ti Ngolo yina ya Kukonda nsuka ya kusakumuka, kele na kati ya Munu?” Yandi salaka kaka nsamunu ata fioti ve, Yandi vwandaka na kiyeka ya kusala mambu nionso yina Yandi tubaka, samu Yandi vwandaka Munungi ya ngolo.

³³ Na kuzingaka na kati ya Yandi, kulunda, ya kubumbama na nsuni ya muntu, mutindu muntu, kasi na kati kuna vwandaka muntu yankaka ve kasi Nzambi ya Ngolo nionso, Yina ya nene mpe ya ngolo. Yandi lendaka kuvanga diaka. Yandi lendaka

vanga bima ya malu-malu. Yandi lendaka tuba, mpe yina Yandi me lomba ke pesama na sekonde yina. Kasi, Yandi kukikulumusaka Yandi mosi, Yandi bikalaka na nsi. Yandi zolaka kupesa mbandu mosi. Yandi zolaka kuvwanda mutindu ya mbote ya Munungi, mpe Yandi vwandaka yawu. Ntangu yayi, Yandi siamisaka Yandi mosi mutindu yina.

³⁴ Mutindu mu ke tubaka mbala mingi na balukutakanu ya munu, ntangu yankaka ya ke pesa kimbangi na suka yayi, na kati ya kimvuka ya bantu yayi, na suka yayi ya Paki ya kitoko. Mama mosi, mamele ya dibuundu yina ke kwikilaka ve na kundima Menga ya Mfumu Yesu. “Kukondwa kumwangana ya Menga, ya kele na mulemvo ya disumu ve.” Yandi tubaka na munu ti Muntu yina vwandaka kaka profete, Muntu mosi ya mbote, mpe mu me sala Yandi Nzambi. Mu tubaka, “Yandi vwandaka Nzambi. Yandi vwandaka Nzambi.”

Yandi tubaka, “Nge ke meka na kukumisa Yandi nene mingi.”

³⁵ Mu tubaka, “Ya kele na bampova ve yina lendaka zonza bunene ya Yandi!” Ndinga ya bantu kele ata fioti na bampova!

³⁶ Na kutubaka na muntu mosi kilumbu yina, diplomate ya Washington, DC, mpe yandi tubaka, na mwa kimbangi mosi ya fioti na madia ya suka kisika beto vwandaka me vukana kintwadi, yandi tubaka, “Mpangi Branham, mu vwandaka Luthérien luzingu ya munu nionso. Kasi,” Yandi tubaka, “kilumbu yina ntangu mu kwendaka na reveil mosi na mutindu ya ntama,” yandi tubaka, “Mu fukamaka na autel, mpe mu zolaka kuzwa nzingulu na Nzambi.” Yandi tubaka, “Mpe ntangu mu vwandaka kuna ya kufukama. . .” Ntangu yayi, yayi kele diplomate ya Washington yina salaka na nsi ya luyalu ya Mfumu ya yinsi Cooledge. Mpe ntangu yandi “yandi talaka,” yandi tubaka, “Mu monaka vision ya Yesu.” Yandi tubaka, “Mu lenda tuba bandinga yivwa, mbote-mbote.” Yandi tubaka, “Kasi mu lendaka kuzwa ve mpova mosi ya kutuba, na kati ya bandinga yivwa nionso yina.” Yandi tubaka, “Na yina mu telemisaka kaka diboko ya munu, mpe Yandi pesaka munu ya malu-malu, samu na kutuba na yawu.” Yandi tubaka, “Mu me mona kaka Nkembo ya kizizi ya Yandi.”

³⁷ Mama yayi tubaka na munu, yandi tubaka, “Mpangi Branham, Yesu vwandaka kima mosi ve kasi muntu, profete kaka.”

Mu tubaka, “Yandi vwandaka Nzambi, mpangi ya munu ya kento.”

³⁸ Yandi tubaka, “Nge ke sala Yandi Nzambi, kasi Yandi kele mutindu yina ve.” Na yina yandi tubaka, “Na nzila kuna na ntoni ya Lazare, Biblia me tuba, ‘Yandi dilaka.’”

³⁹ Ya kieleka, Yandi vwandaka ya kieleka ntima ya Nzambi. Yandi monaka mpasi mutindu beto ke mona mpasi. Yandi

vwandaka muntu mutindu beto kele bantu. Yandi vwandaka, na kati ya nzutu ya Yandi, na bansatu ya mutindu mosi mpe bima yina beto ke sala. Kasi, samu na kukuma Munkayulu ya kulunga, Yandi zolaka kusala yawu. Yandi salaka yawu. Kasi mu tubaka . . .

Yandi tubaka, “Yandi dilaka, ntangu ya vwanda kwenda kuna na ntoni ya Lazare.”

⁴⁰ Mu tubaka, “Kasi, oh, mama, ya ke mbote. Yandi vwandaka Muntu, ntangu Yandi vwandaka dila. Kasi ntangu Yandi telemaka kuna, na lweka ya ntoni yina, kisika mvumbi ya kuvwandaka swi me tandama; kisika nzutu ya kupola vwandaka, ya kufika na serviette; ntangu Yandi tubaka, ‘Beno katula ditadi.’ Yandi bendaka mwa nzutu ya Yandi kintwadi, mpe tubaka, ‘Lazare, basika!’ Mpe muntu yina kufwaka, bilumbu yiya, kutelemaka.”

⁴¹ Yinki ya vwandaka? Kupola zabaka Kiyidiki ya yawu. Moyo zabaka Kiyidiki ya yawu. Mpe Munungi yina ya nene mpe ya ngolo siamisaka kuna ti Yandi vwandaka na Ngolo ya lufwa, mpe ya difelo, mpe ya ntoni.

⁴² Ya kieleka, ya ke yangidika ntima ya beto! Beno ke tubila kubila banzungu, mpe kubula ba-cornes? Yinza fwana vwanda na jubilé na suka yayi, mutindu ya me vwandaka ntete ve, kuboka mpe makelele ya bantu ya Yandi, samu yayi kele kilumbu ya lubambuku yina Yandi nungaka mbeni ya nsuka, mpe tulaka beto bampika na kimpwanza.

⁴³ Yinga, Yandi vwandaka Muntu. Ya kieleka. Yandi siamisaka na kuvwanda Muntu, mpe Yandi siamisaka na kuvwanda Nzambi.

⁴⁴ Na nkokila mosi, ntangu mubu ya nene, ya nganzi, yina bokilaka mafunda ya baluzingu. . . Ntangu yankaka mingi ya beno bamama awa, na suka yayi, bana ya beno ya babakala kufwaka na mubu yina ya nganzi kuna, bawu ntangu yankaka kotaka na kati ya balundindi na bilanga ya nene ya bitumba. Mingi ya bankundi ya beno ya luzolo me lala kuna, ntangu yankaka na nsi ya mubu.

⁴⁵ Kasi na mpimpa mosi ntangu Yandi vwandaka na kati ya mwa masuwa, mpe balundindi vwandaka me fuluka na zulu ya mubu, mutindu kifiniku ya mulangi. Yandi vumbukaka, mpe tulaka dikulu ya Yandi na dikumu ya masuwa. Yandi talaka na Zulu, Yandi tubaka, “Ngemba.” Mpe na balundindi, Yandi tubaka, “Vwanda swi!” Mpe mubu yina ya nene lembamaka na yina ya vwandaka ve na mufiti na zulu ya yawu. Ya kieleka, Yandi vwandaka!

⁴⁶ Ya kele kieleka ti Yandi vwandaka na nzala mutindu Muntu. Ntangu Yandi kulumukaka na mongo mpe Yandi vwandaka na nzala, Yandi talaka na zulu ya yinti samu na kima ya kudia, Yandi vwandaka Muntu. Kasi ntangu Yandi bakaka mampa

yina tanu mpe mwa bambisi, mpe disaka mafunda tanu, Yandi vwandaka kulutila Muntu.

⁴⁷ Ntangu Yandi kufwaka bamvula funda mosi na nkama yivwa me luta, mazusi, ya kunamika na zulu ya kulunsi, na kubokaka samu na mawa, “Nzambi ya Munu, Nzambi ya Munu, samu na yinki Nge me yambula Munu?” Yandi kufwaka mutindu Muntu. Kasi bamvula funda mosi na nkama yivwa na ndambu me luta, na suka yayi, Yandi me siamisa yina Yandi vwandaka! Yandi pesaka kidimbu ya nsuka ya kimesiya ya Yandi ntangu Yandi zengaka babandi ya lufwa mpe difelo na bitini, mpe vumbukaka na ntoni, na lunungu, “Mu ke zinga kukonda nsuka! Mpe, samu Mu ke zinga, beno ke zinga mpe!”

⁴⁸ Ya kele na Munungi! Beno ke tubila kukatula ba-tablier mpe ningisa yawu na zulu? Bantu ke tuba ti beto kele bazoba samu beto ke boka mpe beto ke kima mbangu, mpe beto ke boka mpe beto ke sala makelele. Ba me kuwaka ata fioti ve bakubendama ya lunungu ya Mazulu, ti, “Bitumba me suka!” Munungi ya beto ya nene, ya ngolo me baka lunungi nionso! Yandi me telama yyandi mosi, na suka yayi, nkatu kusimbama!

⁴⁹ Ntangu Yandi kwisaka na ntoto, ba pesaka Yandi nkumbu ya nsi mingi ba lendaka pesa Yandi, mutindu “fanatiki.” Ba bokilaka Yandi *Béelzébul*, “ntinu ya bampeve ya yimbi.” Ya kieleka. Yandi kwendaka na mbanza ya nsi mingi yina kele na ntoto, Jéricho, mpe muntu ya fioti mingi na kati ya mbanza lendaka kutala na nsi samu na kumona Yandi. Kasi na yina Nzambi, bamvula funda mosi na nkama yivwa me luta, me vumbula Yandi! Yawu yina muntu salaka na Yandi. Kasi, na munduki ya zola, Yandi nungaka bampeve ya yimbi nionso.

⁵⁰ Mpe Nzambi tombolaka Yandi na zulu mingi, mpe pesaka Yandi Nkumbu mosi na zulu ya bankumbu nionso kele kuna na Mazulu mpe na ntoto. Nkumbu nionso na Zulu ke fukama na Nkumbu ya “Yesu”! Wanzio nionso, monarque nionso, bima nionso ke fukama na Nkumbu ya “Yesu”! Ndinga nionso ke ndima Yandi, mabolongo nionso ke fukimina Yandi. Mpe Yandi me tomboka na zulu mingi, ti Yandi fwana kulumusa meso samu na kutala Mazulu. Ya kele Munungi ya ngolo! Ya kele Yandi yina salaka yawu! Ntangu Yandi bikaka ntoto, na manima, mazono na nkokila beto vwandaka, Yandi vwandaka na bafungula ya lufwa mpe ya difelo ya kunamika na lweka ya Yandi, amen, “Beno tita ve, Mu kele Yandi yina kufwaka, mpe Mu ke zinga diaka kukonda nsuka. Mpe” (*mpe* kele kivukisi) “Mu kele na bafungula ya lufwa mpe ya difelo, ya kunamika kaka *awa*.” Beno zonzila Munungi! “Mpe, samu Mu me nunga, Mu me sala kaka bala-bala ya nene samu beno kusala nzietolo.”

⁵¹ Muntu vwandaka ya kumanga na Zulu, bala-bala ya nene vwandaka ya kukanga. Ya vwandaka na bala-bala ya nene ve. Kasi, kisika ya vwandaka na bala-bala ve, Yandi kwisaka samu

na kusala mosi. Oh, la la! Ndilu ya ntete vwandaka bampeve ya yimbi ya ntembe, ya kulanda vwandaka ya kubeba, ya kulanda vwandaka munimi; ntoto yayi vwandaka ya kufika na bandilulu ya ngolo ya mpeve ya yimbi; na manima kimbevo, maladi. Kasi ntangu Yandi bandaka na kutomboka na Zulu! Mazono na nkokila beto monaka Yandi ke basika na difelo, na bafungula ya lufwa mpe ya difelo na lweka ya Yandi. Na suka yayi beto ke mona Yandi ke tomboka. Alleluia! Ntangu Yandi vumbukaka, Yandi vwandaka . . . Yandi vwandaka na lunungu. Mpe, mutindu Yandi tombokaka, Yandi bukaka ngolo ya mpeve ya yimbi nionso yina vwandaka kanga muntu. Yandi tombokaka na Zulu, mpe Yandi pesaka makabu na bantu, makabu ya Mpeve-Santu. Munungi ya ngolo! Yandi me telema yandi mosi, na suka yayi! Mpe, kati-kati ya Yandi na bakwikidi nionso, ya kele na bala-bala ya ntama ya kusakumuka ya busantu yina muntu ya kusungama ke tambula na yawu. Ya kele ve na nzila ya kutina. Ya kele kaka na ndilulu mosi ba me zenga katuka na Nkembo. Yandi bikaka Bitambi ya Menga mutindu Yandi vwandaka tambula na ba-couloir ya bampeve ya yimbi, mpe salaka bala-bala ya nene samu na beto, nsongi na nsongi. Yandi me vwanda na Zulu, na suka yayi, mutindu Munungi ya ngolo!

⁵² Bantu ya Yandi kele na jubilé. Makumi ya mafunda kati ya bawu, na yinza ya muvimba, ke na kuboka lunungu.

⁵³ Mu vwandaka tala dibuundu yayi ya ntama mpe ya madidi ya mambu ya ngaanda yina ba ke kotaka. Mu lenda banza muntu mosi kutuba . . . Mu ke talisa nge kulosama ya yawu.

⁵⁴ Awa, na ntangu Mvita ya Ntete sukaka, nsangu mosi kwisaka kuna na bala-bala, beno kwisa kukota na bus Greyhound. Ba tubaka, “Makelele yina nionso kele samu na yinki? Yinki nionso yina zola tuba?”

⁵⁵ Mpe mosi na kati ya bawu tubaka, “Beno tala awa, zulunale yawu yayi. Mvita kele diaka ve.” Mpe bantu nionso vwandaka boka mpe ke sala makelele.

⁵⁶ Kasi kento mosi tubaka, “Oh, la la, samu na yinki ya fwana suka mutindu yina?” Yandi tubaka, “Kana ya lendaka wumela mwa bilumbu diaka,” yandi tubaka, “John na munu ke vwanda ya kuvwanda na zulu ya bala-bala mosi ya kukondwa mpasi.” Yandi tubaka, “Beto zolaka vwanda ya kuvwanda kuna.”

⁵⁷ Ya vwandaka na bakala mosi ya kutelama na manima na kisika ya kupesa nsangu na bus; yandi simbaka kento yina mpe yandi losaka yandi kaka na kielo. Mpe ntangu pulusu kangaka bakala yango, yandi tubaka, “Kikuma mu me sala yawu,” yandi tubaka, “kento yina kele na muntu mosi ve kuna yina yandi ke banza. Kasi mu ke na bana-bakala zole kuna.” Yandi tubaka, “Mu lendaka ve kukanga ba-émotion ya munu.”

⁵⁸ Oh, mpangi-bakala! Mu kele na tata kuna. Mu ke na bankundi ya luzolo kuna. Ya kele kima mosi samu na munu,

ntangu Yesu nungaka. Mu kele na kento. Mu kele na bébé. Mu ke na bankundi ya luzolo. Munungi yina ye nene, ya ngolo! Beno lenda bokila munu “exalté” to “musambidi ya fanatiki,” nionso yina beno me zola. Kasi, ntangu mu ke banza ti mvita yina ya nene me suka, ba me futa ntalu, ba me baka lunungu. Yesu vumbukaka na lufwa, kidimbu ya nsuka ya kimesiya ya Yandi, ti yawu nionso me suka. Yandi ke zinga, na suka yayi, na bafungula ya lufwa mpe ya difelo. Mu ke na bankundi ya luzolo yina kele kuna na ndilulu kuna. Mu kele na bala-bala yayi ya nene ya ntama, mu ke na kutambula samu na kumona bawu. Beno banza ve ti mu kele zoba. Oh, kasi mu ke na kiese mingi ya me suka nionso! Ya ke kisalu yina me suka.

Na luzingu, Yandi zolaka munu; na lufwa,
Yandi vulusaka munu;
Na kuzikama, Yandi nataka ntama masumu ya
munu;
Na mvumbukulu, Yandi nungisaka munu ya
mpamba ntangu nyonso:
Kilumbu mosi Yandi ke kwisa—oh, kilumbu ya
nkembo!

⁵⁹ Mbotika yayi ya ntama ya kusakumuka ya Mpeve-Santu, samu na kutwadisa beto na bala-bala yayi ya ntama ya kitoko, oh, wapi mutindu Ya kele ya nkembo! Wapi mutindu mu lendaka vwanda na nsoni ya Yawu? Mu ke vukana na Santu Paul, na suka yayi, na kutubaka mutindu yayi, “Mu ke na nsoni ve ya Nsangu ya mbote ya Yesu Klisto, samu Yawu kele Ngolo ya Nzambi samu na mpulusu.” Ya kele Ngolo na zulu ya kimbevo. Ya kele Ngolo na zulu ya lufwa. Ya kele Ngolo na zulu ya ntoni.

⁶⁰ Ntangu ntumwa yina ya ntama ya mambu ya ngolo, kumaka na nsuka ya nzila ya yandi, mpe ba timunaka ntoni ya yandi kuna, mpe lufwa vwandaka na ntwala ya kizizi ya yandi, yandi sekaka kaka na ntwala ya yawu. Yandi tubaka, “Lufwa, wapi ntunga ya nge? Ntoni, wapi lunungu ya nge?” Na yina yandi bokaka balukumu ya Nzambi, “Kasi matondo na Nzambi Yina pesaka beto lunungu na nzila ya Mfumu ya beto Yesu Klisto!”

⁶¹ Munungi ya kulutila ngolo yina me zingaka ntete ve, Munungi ya kulutila ngolo yina me kufwaka ntete ve, samu Yandi vwandaka kaka Mosi yina lendaka nunga; kufwa, mpe kununga lufwa yawu mosi, mpe kuvumbuka diaka na lunungu! Yandi siamisaka yina Yandi vwandaka. Ya vwandaka kidimbu ya nsuka ya kimesiya ya Yandi.

⁶² Mpe ntangu yayi, na nzila ya siansi, kana ya lendaka vwanda na muntu mosi na kati ya kivinga yayi na suka yayi, yina kele mambele ya dibuundu yina kele tiya ve madidi ve, mpe yina me zaba ve kiese ya bitumba yina me vwanda kuna. Bantu ke boka, bantu ke sepela, bantu ke dila! Beno ke tuba, “Yinki kele diambu na bawu?” Ba me zaba ti ya kele diambu yina me suka. Ya me

suka nionso! Ya kieleka! Beto ke [Mpangi Branham me bula maboko—Mu.] na kubula bafafari. Beto ke na kubula bampungu, mpe Nsangu ya mbote ke na kumwangana. Nkembo mpe Ngolo ya Nzambi me zabana. Mpe ya ke kisalu yina me suka, ngwisani me ndimama; nkembo na Nzambi, Klisto me ndima yawu na Menga ya Yandi Mosi! Bitumba me mana. Ba me baka lunungu. Mu me nungaka yawu ata fioti ve; Yandi nungaka yawu! Mu ke kaka na kiese samu na yawu. Oh, la la!

⁶³ Ntangu mingi ya bana-babakala yina vwandaka vutuka katuka bayinsi ya nzenza, ba me tuba na munu, ntangu masuwa kumaka na New York, kaka mutindu ya kotaka na port, ba talaka kuna mpe ba monaka Kiteki ya Kimpwanza. Ya kele kima ya ntete beno ke mona, kutelema. Ba telemaka, mingi ya bawu bikata ya binwani mvita ya ntama kuna na pont ya masuwa, na mutindu ti ba lendaka mona yawu. Mpe ba bandaka na kumona Kiteki yina ya Kimpwanza, ba bandaka na kudila. Ba vwandaka diala. Ba lendaka ve kupesa yawu lusalusu. Bakala ya nene mingi telemaka kuna, bakala ya nene ya ngolo, ke tekita mpe na kuninganaka. Ba lendaka ve kukanga ba-émotion ya bawu. Samu na yinki? Ya vwandaka benedele ya kimpwanza. Kaka na manima ya Kiteki yina ya Kimpwanza, vwandaka . . . papa vwandaka, mama, bankundi ya luzolo, chérie, kento, bébé, nionso na zulu ya ntoto yayi yina vwandaka ya luzolo samu na bawu, ba vwandaka kaka na manima ya yawu. Mpe kaka na ntwala ba kota kuna, ba ndimaka, ya vwandaka yinsi ya kimpwanza mpe yinzo ya bantu ya ngolo. Ya kieleka, ya zolaka ningisa ba-émotion ya beno, benedele yina ya ntama yina vwandaka pepa. Beno banza yawu, kinwani mvita ya ntama na bamputa ya bitumba vwandaka kwisa na couloir! Ya kieleka, ya vwandaka ntangu ya mbote.

⁶⁴ Kasi, oh, mpangi-bakala, mosi ya basuka yayi, ntangu Masuwa ya ntama ya Sion ke pepa, mpe mu ke mona benedele yina me telama kuna, Kulunsi ya ntama ya ngolo! Na yina mipepe ke bula babendele ya yandi ya ntama ya mpembe, mutindu yandi ke tambula na kati ya lufwa. Yinki lunungu ya kele! Samu na yinki, kuyituka ve ti beto lenda ve kukanga émotion ya beto! Kima mosi me salama; beto me kuma bisi ntoto. Diambu me mana.

⁶⁵ Ntangu ba vwandaka tanda kiamvu ya nene kati-kati ya Nord na—na—na—na Australie ya Sud, katuka Sydney, tii na Sud ya Sidney. Wapi mutindu muntu nionso bakaka . . . Na yina, ba kwendaka na yinsi ya muvimba, samu na kumeka na kuzwa muntu ya kusala yawu. Kisalu yina vwandaka nene mingi, samu ba tubaka ti muntu mosi ve zolaka kusala yawu. Na nsuka, bakala mosi ya Angleterre tubaka, “Mu ke sala kisalu yango.” Mpe ntangu yandi kwendaka kuna samu na kusala kisalu yina, yandi talaka mbote konso boulon yina kotaka na kiamvu. Lukumu ya yandi vwandaka me tesama. Yandi talaka mbote poto-poto mpe bima nionso yina kotaka kuna. Yandi balukaka,

mpe ya kulutila mbote yina ya lendaka kuzwa; yandi kuzwaka ba-mécanicien ya kulutila mbote, ba-chimiste ya kulutila mbote, bima nionso ya kulutila mbote yandi lendaka kuzwa, na lweka ya yandi. Mpe, na nsuka, ntangu kiamvu kumanaka, mpe kilumbu kumaka yina yandi fwana meka yawu.

⁶⁶ Masawula kwisaka na lweka mosi, mpe ba tubaka, “Ya ke simba ve. Ya ke kubwa. Ya ke na zelo mingi kuna.”

⁶⁷ Kasi yandi timunaka na nsi, na nsi, na nsi, na nsi mingi. Yandi vwandaka na kivuvu. Yandi zabaka ti yandi me meka bima nionso. Mpe yandi tubaka, “Mu ke sala nzietolo ya ntete na zulu ya yawu, munu mosi.” Mpe na yina yandi tambulaka na zulu ya kiamvu, na ntuala ya mfumu ya mbanza, na manima mutindu yina; mpe ba-train ya nene, pene ya sambanu na ntuala, kwisaka kuluta, ningisaka kiamvu yina. Bakala yayi ya nene yina salaka yawu kwendaka na ntuala ya cortège yayi, mutindu yayi, “Kana ya me kubwa, mu kele na yawu.” Kasi yandi vwandaka na kivuvu.

⁶⁸ Ya ke mutindu yina Mfumu ya beto ya kusakumuka salaka ntangu Yandi salaka Dibuundu ya Yandi! Yandi talaka mbote konso boulon, bima nionso yina kotaka na Yawu, samu Ya fwana vwanda yina ba me sukula na Menga! Mpe mosi ya bantu ya masawula vwandaka ya kutelema na lweka, yandi tubaka, “Yina kele nkonga ya ba-exalté, ba ke sala yawu ve.” Kasi mosi ya bilumbu yayi ya nkembo! Munungi yayi ya nene, ya ngolo ke tambula na ntuala ya beto bubu yayi, na lunungu! Bika yandi nguluma, ya sala yina yandi me zola, Yandi ke . . . Ya ke telumuka ata fioti ve, kisika mosi ve, samu Yandi me sala nzila, mpe me manisa yawu. Ya kieleka!

⁶⁹ Beto banza bubu yayi na bandinga ya bantu, beto ke tula mabanza ya beto na zulu ya bima ya yinza. Kasi bika mu tuba na beno kima mosi, mpangi-bakala, beno vwanda ata fioti ve na nsoni ya Nsangu ya mbote! Oh, mpangi-bakala, mu ke kaka muntu ya mambu ya ntama, yina me butuka mbala zole, yina me butuka na Mpeve-Santu, ya Mpeve ya Nzambi. Mu me butuka mutindu yina, yawu yina nionso mu kele, mpe nionso yina mu ke zola kuvwanda.

⁷⁰ Na ntangu mosi, ntama mingi ve, ya vwandaka na kento mosi yina kwendaka na université. Mpe yandi vwandaka mwana-kento mosi ya ntwenya, ya kitoko. Mpe ntangu yandi vutukaka na yinzo, yandi nataka mwa mabanza ya université.

⁷¹ Mpe ntangu yankaka, na suka yayi, mingi na kati ya beno vwandaka na mingi ya mabanza ya beno ya nganda. Ntangu yankaka beno me kangama, na dibuundu, na mingi ya mabanza ya beno. Mbote, beno katula yawu, ya kele kima ya kulutila mbote mu zaba na kusala.

⁷² Na yina mwana-kento yayi, ntangu train telamaka kuna na ntuala, yandi nataka mwana-kento mosi ya ntwenya na yandi,

mosi ya mutindu ya mwa ba-snickel-fritz, beno zaba, mutindu Elvis Presley. Mpe ntangu yandi vwandaka me telema kuna, beno zaba, na train, mama ya yandi vwandaka, na nganda, mama mosi ya kiboba vwandaka ya kutelema kuna, na bidimbu ya bamputa, na kizizi ya yandi; ya fioti, na mapeka ya kuvimba; ya vwandaka me lwata robe ya calico, mwa écharpe na zulu ya mapeka ya yandi. Mpe mwa snickel-fritz yayi yina vwanda na yandi, mwana-kento yayi yankaka, talaka, mpe yandi tubaka, “Mbote, nani kele muntu ya mawa, mputu yina ya kitoko ve na kutala?”

⁷³ Mbote, beno zaba, ya pesaka mwana-kento yango nsoni mingi, yandi tubaka, “Mu zaba ve,” samu yandi vwandaka na nsoni mingi, mpe yandi vwandaka na mabanza mingi ya yinza na yintu ya yandi. Mpe ya vwandaka mama ya yandi.

⁷⁴ Ntangu yandi basikaka na train, mputu ya kiboba ya mama kwendaka mbangu, samu na kuyamba yandi. Yandi tubaka, “Oh, chérie, Nzambi kusakumuna mwa ntima ya nge.” Mpe yandi balukaka na manima ya yandi mpe bandaka na kukwenda, mutindu ti yandi me zaba yandi ve. Yandi bakaka nsoni, samu mama ya yandi vwandaka yimbi mingi.

⁷⁵ Mpe ya salamaka ti, mutwadisi yina vwandaka na train yina, zabaka disolo. Yandi kwendaka kuna, mpe tulaka maboko ya yandi na zulu ya dipeka ya mwana-kento yina, balulaka yandi na ntwa ya nkonga ya bantu yina, yandi tubaka, “Nsoni na nge! Nsoni na nge!” Yandi tubaka, “Mu monaka ntangu yina mama ya nge vwandaka bambala kumi kitoko mutindu nge kele.” Yandi tubaka, “Yandi vwandaka. . . mu vwandaka zinga kizunga yango.” Mpe yandi tubaka, “Nge vwandaka bébé ya fioti, mpe nge vwandaka na zulu ya étage na berceau ya nge. Mpe mama ya nge vwandaka tanda bilele na manima ya lupangu.” Mpe yandi tubaka, “Na mbala mosi, fúlu bakaka tiya, mpe yinzo ya muvimba pelaka tiya. Mpe na yina mama ya nge ya fioti kimaka mbangu kuna, mpe yandi zabaka ti nge vwandaka na étage, kuna na zulu.” Yandi tubaka, “Ba bokaka, mpe mekaka na kukanga yandi. Kasi yandi losaka yina vwandaka na yandi, kuna, mpe kwendaka mbangu na kati ya tiya yina, na zulu ya étage; mpe yandi katulaka bilele ya yandi na nzutu ya yandi, mpe yandi fikaka nge na kati ya yawu. Mpe yandi kwisaka kuna, yandi vutukaka na kati ya tiya, ya me simba. Mpe yandi kubwaka ngambu, na kati ya lupangu, na nge na maboko ya yandi.” Mpe yandi tubaka, “Yandi bakaka yina zolaka kukeba yandi, mpe yandi kebaka nge.” Mpe yandi tubaka, “Yawu yina nge kele kitoko bubu yayi, yawu yina yandi kele yimbi. Mpe, nge zola tuba na munu, nge ke vwanda na nsoni ya bidimbu ya bamputa na zulu ya mama ya nge?”

Mu ke banza bubu yayi:

Kana Yesu kunataka kulunsi yandi mosi,
Mpe yinza ya muvimba ke vwanda na
kimpwanza?

Ya kele na kulunsi samu na muntu nionso,
Mpe ya ke na kulunsi samu na munu.

⁷⁶ Kana Yesu vwandaka “Béelzébul,” na yinza yayi, ba sekaka Yandi mpe ba vwezaka Yandi, mpe ba komaka Yandi na kulunsi, Yandi bakaka nsoni samu na munu, mu ke na kiese mingi na kunata nsoni ya busantu ya Yandi. Yinga, tata. Beno bokila, “Exalté!” nionso yina beno me zola kubokila, konso diambu yina beno me zola na kusala. Ya ke kanga yawu nzila ata fioti ve. Mu ke kaka na kiese, na suka yayi, ti, na kati ya ntima ya munu, Klisto yina me vumbuka ke zinga mpe ke yala. Mu ke mosi ya kinama ya Yandi. Mu ke na kivuvu ti beno kele, mpe.

⁷⁷ Ntangu ya beto me luta ntangu yayi. Ya kieleka ya me lunga ngunga ya sambwadi, ntangu beto tubaka ti beto ke bika bantu. Balukutakanu yina ke kwisa na ntwala ke banda na manima ya bangunga zole, ntangu yayi, na ngunga ya yivwa na ndambu.

Beto kulumusa bayintu ya beto, na mwa ntangu fioti, samu na kusamba.

⁷⁸ Tata ya Mazulu ya kusakumuka, ba-minuti makumi yiya na tanu me luta, Ndinga me longama. Bantima ya beto kele na kiese. Jubilé ke na kulandila; ya kele kaka jubilé ya kilumbu mosi ve, kasi jubilé ya Seko! Na Nkembo, Bawanzio ke na kuyimba. O Nzambi, Dibundu, ke na kuyimba, lunungu. Bangunga ya kiese ke na kubula. Mioyo yina vwandaka ya kufundisa na lufwa, mpe samu na kufwa mpe kukwenda na ntoni ya diabulu; diabulu ba me nunga yandi! Ba me nunga lufwa. Ba me nunga ntoni. Ba me nunga kimbevo. Ba me nunga kinzambi-Nzambi. Ba me nunga mayele ya yimbi. Ba me nunga kimbeni. Ba me nunga kukondwa kukipe mambu. Ba me nunga mambu ya nganda. Ba me nunga balukumu. Ba me nunga bima nionso. Klisto kele Munungi ya nene!

Beno tala! Beno tala Munungi ya Ngolo,
(muyimbi tubaka)

Beno tala! Beno tala Yandi na pwelele,
Samu Yandi kele Munungi ya Ngolo,
Kubanda na ntangu Yandi pasulaka vwale na
bitini zole.

⁷⁹ Yandi pasulaka vwale yina vwandaka bumba muntu na Nzambi, mpe ntangu yayi Nzambi ke zinga na kati ya bantu. Yandi pasulaka vwale yina vwandaka bumba kubeluka ya Nzambi. Yandi pasulaka vwale yina vwandaka bumba lusakumunu ya Nzambi. Yandi pasulaka vwale yina vwandaka bumba kiese ya Nzambi. Yandi pasulaka vwale yina vwandaka bumba ngemba ya Nzambi. Ntangu yayi vwale me pasuka na bitini zole. Na Menga ya Yandi Mosi, Yandi me tambula mutindu

Munungi! Bitumba me mana, Yandi me siamisa yawu na beto na mvumbukulu ya Yandi. Mpe ntangu yayi Mpeve-Santu kele mbangi, ba me fidisa samu na kutwadisa beto.

⁸⁰ O Nzambi ya Kukonda nsuka, kana ya kele na muntu mosi awa na suka yayi, yina me baka kaka ntangu ya yinda na kubaka lukanu, na kati mpe na nganda, na bala-bala, yina ke na kubwa na lweka ya nzila; yina me vwandaka ata fioti ve na kiyeka ya kutambula na kati-kati ya nzila, na ba-héro ya nene, ba-héro ya nene yina tambulaka na kati-kati ya bala-bala ya nene; beto ke sambila, na suka yayi, ti ba ke kukiyambula bawu nionso na Nge, mpe ba ke basika mpe ke sepela na lunungu yayi ya nene yina ba me nunga na Mfumu ya beto yina me vumbuka na lufwa. Pesa yawu, Tata, samu beto ke lomba yawu na Nkumbu ya Klisto.

⁸¹ Mpe na yina beto ke na bayintu ya beto ya kukulumusa. Mu ke kukiyufula, na mwa ntangu yayi, ti kana beno zola telemisa maboko ya beno na Klisto, mpe beno tuba, “Klisto, mu me sepela, mu ke vwanda diaka ata fioti ve na nsoni ya Nge. Mu vwanda kaka ya kukondwa ngolo.” Nzambi sakumuna nge, mama. Nzambi sakumuna nge, tata. Nzambi sakumuna nge, nge. Oh, la la, maboko me telema bisika nionso! “Mu vwanda fioti ya kukondwa ngolo. Mu vwanda kaka na nsoni. Mpe mu me mona kieleka kisika ya munu ntangu yayi. Mu lendaka ve kusala yawu ata fioti. Mu zolaka kutelema kuna, samu na kupesa kimbangi ya munu! Mu ke zola kuvwanda mutindu yina. Mu ke zola tuba na muntu nionso, ‘Mu me butuka mbala ya zole.’ Mu ke zola tuba na muntu nionso, ‘Mu me kuzwa Mpeve-Santu.’ Mu ke na nsoni ve ya Nsangu ya mbote, samu Ya kele Ngolo ya Nzambi samu na mpulusu. Mu ke zola kuvwanda Muklisto ya kieleka na ntuala. Mu me vwanda ntete ve. Kasi, na lusalusu ya Nzambi, na suka yayi ya Paki, mu zola kuvwanda. Mu ke vwanda.” Muntu yankaka ke telemisa maboko ya yandi ntangu yayi ntete beto sambila? Nzambi sakumuna nge, nge, nge.

⁸² Oh, la la, beno tala balukanu! Pene ya makumi zole na tanu to makumi tatu, ya kuvwanda na kati ya mwa kimvuka yayi ya bantu na suka yayi, me baka lukanu. Na suka yayi ya nene ya lunungu, ba ke, na lemvo ya Nzambi, telema mpe kuvwanda na nsoni ya Nsangu ya mbote ve, samu Ya kele Ngolo ya Nzambi samu na mpulusu.

⁸³ O Nzambi, mutindu maboko yayi me telema na zulu, mpe musiki ke na kuwakana na malembe kuna na nzila, mutindu beto me luta lufwa na Luzingu, samu nge me tuba, “Yandi yina ke kuwa Bandinga ya Munu, mpe ke kwikila na Yandi yina fidisaka Munu, kele na Luzingu ya mvula na mvula.” Ba me luta lufwa na Luzingu, samu Nge kumaka lufwa ti ba lendaka kukuma Luzingu, na nzila ya mvumbukulu ya Nge. Nge kulumukaka na nsi kulutila Bawanzio, Nge kulumukaka samu na kuvwanda muntu, Nge basikaka na Théophanie ya nene Kuna, yina kumaka nsuni mpe vwanda na Menga, mpe mwangisaka Menga yina,

ti Nge lendaka sala nzila ya kutinina samu na beto nionso. Na yina Nge salaka kaka yawu ve, (beto ke tangaka yawu na kati ya Biblia), kasi Nge me siamisa yawu, kukondwa kubwa, na kuvumbukaka na lufwa, mpe na kuvumbulaka bantu ya kufwa ntangu Nge vwandaka awa na zulu ya ntoto; yina kaka ve, kasi Nge pesaka, Nge me siamisa yawu mbala zole, mutindu Nge salaka na Abraham; ntangu yayi, na nganda ya yina, Nge me fidisa diaka Mpeve-Santu mutindu mhangi mosi. Mpe beto ke na Mvwandulu ya Yandi ya kusakumuka na beto, mpe na kati ya beto, na kutwadisaka beto, na kutwadisaka beto na kati ya Kieleka nionso mpe Nsemo.

⁸⁴ Beto ke vutula na Nge matondo samu na mingi ya maboko yayi ba me telemisa na zulu, na suka yayi, na kutubaka, “Mu me baka ntangu yayi Klisto mutindu ya munu.” O Nzambi, kana ba me botamaka ntete ve na masa, samu na kutalisa lufwa ya nene, luzikulu, mpe mvumbukulu ya Mfumu ya bawu ya kusakumuka, ti bawu vutuka na lukutakanu na suka yayi, na kunataka bilele ya bawu, mpe kukubama samu na kukulumuka na kiziba yayi ya masa ya madidi. Pesa yawu, Tata.

⁸⁵ Sakumuna beto. Lemvokila beto na masumu ya beto. Beto ke pesa Nge lukumu, na bansungi yina ke kwisa. Ntangu bitumba ke mana, ntangu mulinga ke suka, mpe kiese nionso me mana, ya bikoba ya ntoto yayi, kisika beto ke kumisa Nge na nionso beto ke na yawu, beto fwana vwanda na bandinga ya malu-malu, bantu ya malu-malu, samu na kukumisa Nge na nzila ya yawu. Bika ti beto kota kuna na kiese. Samu beto ke lomba yawu na Nkumbu ya Klisto. Amen!

⁸⁶ Beto telama ntangu yayi...?..Beno zimbana ve balukutakanu, na ngunga ya yivwa na ndambu. Beno vutuka na yinzo, beno baka madia ya beno ya suka. Beno vutuka, beto ke vingila kuvwanda na beno ntangu yayi. Na manima ya nkokila yayi, beno bambuka moyo. Mu fwana kwenda na kingenga na manima ya midi yayi, samu na kulonguka mpe kusambila.

⁸⁷ Na yina mu ke tuba na beno, ti, Klisto kele ya moyo, Yandi kele ya kufwa ve. Mpe mu ke kwikila, na ntima ya munu ya muvimba, Yandi ke vwanda kaka na kati ya kivinga yayi na nkokila yayi, samu na kutalisa ti Yandi kele ya moyo, samu na kusala bima mosi yina Yandi salaka na suka ya ntete ya Paki mpe na nzietolo ya luzingu ya Yandi. Kana ya kele mutindu yina ve, na yina mu ke vwanda profete ya luvunu. Mu ke na kiese na kuzaba ti na kati ya ngunga yayi ya nene ya mudidi yayi beto ke na kuzinga ntangu yayi, na yina kivuvu nionso, na kutala, me kwenda; Klisto, Ditadi ya ngolo beto lenda telama, bisika yankaka nionso kele putulu. Mbote mingi.

⁸⁸ Mwa nkunga ya beto, ya kubasika, ya *Baka Nkumbu Ya Yesu Na Nge*. Beto nionso, kintwadi ntangu yayi.

Baka Nkumbu ya Yesu na nge,
Nge mwana ya mawa mpe ya kiadi;
Ya ke pesa nge kiese mpe . . .

⁸⁹ Beno baluka, mpe beno pesa mbote, mpe beno tuba,
“Lukumu na Mfumu,” na muntu yina kele pene-pene ya beno.
(Mbote, beno sakumuna Mfumu . . .? . . .)

Kivuvu ya ntoto mpe kyese ya Mazulu;
Nkumbu ya ntalu, Oh Nkumbu ya mbote!
Kivuvu ya ntoto mpe kyese ya Mazulu.

⁹⁰ Ntangu yayi muntu nionso ke tala kaka na lweka yayi? Beto kumisa Yandi kaka. Beno telemisa kaka maboko ya beno na zulu, mpe beno tuba, “Matondo na Nge, Mfumu, samu Nge me vulusa moyo ya munu.” Mbote mingi, beto nionso!

Matondo na Nge, Mfumu, samu Nge me vulusa moyo ya munu.
Matondo na Nge, Mfumu, samu Nge me sala munu ya muvimba.
Matondo na Nge, Mfumu, samu Nge me pesa munu,
Mpulusu ya Nge ya nene ya kifuluka mpe ya kimpwanza.

⁹¹ Yinki kima yayi ya kimpwanza! Beno zola Yandi? Beno tuba, “Amen.” Oh . . . Bima nionso me mana ntangu yayi, bana. Bima nionso me suka, bitumba kele diaka ve, mvita kele diaka ve, kima mosi ve beno fwana sala; nionso me salama dezia. Beto ke sepela kaka! Oh, la la! Beto kele ya muvimba, na kati ya Yandi!

. . . mu ke pema,
Na kivuvu mpe ya kukebama na boma nionso;
Mu ke pema, mu ke pema,
Mu ke pema na maboko ya kukonda nsuka.
Oh, wapi mutindu ya kele mbote na kutambula na nzila yayi ya nzietolo,
Mu ke pema na Diboko ya kukonda nsuka;
Oh, wapi mutindu nzila kele ya kifuluka na nsemo konso kilumbu,
Mu ke pema na maboko ya kukonda nsuka.
Mu ke pema, mu ke pema,
Na kivuvu mpe ya kukebama na boma nionso;
Mu ke pema, mu ke pema,
Mu ke pema na maboko ya kukonda nsuka.

Beno yina lenda, mpe kele na muswale, beno basisa yawu.

. . . oh, mu ke pema,
Na kivuvu mpe ya kukebama na boma nionso;
Mu ke pema, mu ke pema,
Mu ke pema na maboko ya kukonda nsuka.


Ntangu yayi Biblia ya beno!

Mu ke pema, mu ke pema,
 Na kivuvu mpe ya kukebama na boma nionso;
 Mu ke pema, mu ke pema,
 Mu ke pema na maboko ya kukonda nsuka.

⁹² Yinki yina? Na kivuvu mpe ya kukebama, bisika nionso, nionso me mana, bitumba me mana, kidimbu ya nsuka me bukana, Yandi me kwenda na zulu. Alleluia!

Mu ke pema, mu ke pema,
 Na kivuvu mpe ya kukebama na boma nionso;
 Mu ke pema, mu ke pema,
 Mu ke pema na maboko ya kukonda nsuka.

⁹³ Ntangu yayi beto kulumusa bayintu ya beto na ntwala ya putulu kisika Nzambi bakaka beto, kisika kilumbu mosi beto ke basika na putulu ya ntoto. Na yina, Mfumu ya beto, nataka na putulu, kwendaka na putulu, samu na kupesa beto Mpeve ya Yandi yina ke kufwaka ve, Yandi tombokaka katuka na putulu, mpe bayina nionso kele kati na Yandi, ke tomboka na Yandi kilumbu mosi, na bizunga ya kusakumuka.

⁹⁴ Mutindu beto me kulumusa bayintu ya beto, mu ke mona Mpangi Smith kele na kati ya beto, na suka yayi, pasteur ya Dibuuundu ya Nzambi; yandi bokilaka munu mazono na nkokila. Mpangi Smith, kana nge ke zola kukwisa. Mu ke kukiyufula ntangu yayi, ti kana Mpangi Smith ke bika beto na mpova ya kisambu. Na yina beno ke vutuka nswalu na manima na bayinzo ya beno, mpe beno ke baka madia ya beno ya suka. Beno kwisa vutuka samu na lukutakanu ya Lukolo ya Lumingu, mpe kisalu ya mbotika, yina ke banda mbala mosi na ngunga ya yivwa na ndambu. Beto kulumusa bayintu ya beto, na yina Mpangi Smith ke bika bantu na kisambu. 

MUNUNGI YA NENE MPE YA NGOLO KNG57-0421s
(The Great And Mighty Conqueror)

BANDANDANI YA REVEIL YA PAKI

Nsangu yayi ya Mpangi William Marrion Branham, kulongamaka na Kingelesi, na suka ya Lumingu ya Paki na kudasika ya mwini, na kilumbu ya 21 ya Ngonda ya yiya, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org